

Filipay

O

Sansandek Pol mar tonan uliq Filipay-ib lahta

Gamuk ameb lehaqta

Pol ame amebta kamis urotim saw Masedoniya-ib gwahtimta nab in le uliq Filipay-ib Yesus awagamun dimunta na bilam (Aposel 16.8-15 nab teq ni ahol waq). Abeb in lehim uliq araqab ossa mataw in wazim irquriy. Irquran ossa Kraiss ago on mataw uliq Filipay-ibta na huritim in Pol amen mani asor urotim mat anan Epafroditus ugan in waqim ad Pol ago hib tilah, Pol aholyon didaq nagah zaydaq haqad. An Pol mani na waqim anad ayahmo dimniysa in Filipay on mataw na esey negnan haqad gimen sansandek ka mar tonta (Filipay 1.5; 4.10-19).

Teq gamuk ka alulin ta asor kazaq usaqmo. 1) Pol ezaq iyim osaqa na ago in gibilan (Filipay 1.12-26; 4.10-19). 2) Teq in Filipay on mataw na ginad helta zaway ug, luweq Pol irquran osaqa na ago in ginad meqniysa in Kraiss abinib afaqan sornan gituw hiqiy daqay haqad (Filipay 1.27-30; 4.4). 3) Teq in Filipay ginad enqenunid in gihol wazid woqsa ginad amulikmo iyeq os daqay haqad in bilam (Filipay 2.1-11; 4.2-5). 4) Teq in Timoti ayow Epafroditus inaq gibin iluwmo, abeb mataw giger na le uliq Filipay-ib gwahtiqid Filipay mataw na in giwazineq gilowan ton daqay haqad (Filipay 2.19-30). 5) Teq in Filipay on mataw na gidek waz, in mataw gihol abatan asan urotgo bilaqayta na teq mataw gihol bilaqgo adan muzinayta na gigo in girabuneq giholib hiqiy daqay haqad (Filipay 3.1-4.1).

Filipay on mataw Pol inaq yow emim ayahmo ulumsihan Pol in ginan anad dimniy

1 ¹Yaqmo Pol ya iyow Timoti inaq i giger Krai Yesu ago kabibiy matawta iyim i sansandek ka mar tonim eman uliq Filipay-ib God ago on mataw tawonta Krai Yesu inaq soqotim osayta na teq in gigo mataw danmebta na teq in gigo kabibiy matawta nagan bunmo gigo hib lehaq.

²I Gimam God teq i gigo Iyahta Yesu Krai inaq in gigem dimunta negad in ne gigem emid kiskismo usan.

Pol God esey ug

³Kam bunmo ya ne ginadin emad yaqgo God esey ugaiqta. ⁴Esey ugad sirisirimo ya ne bunmo ginan inad dimniysa ne gimen God bulonaiqta. ⁵Na ezaqgo mebmemo ne Yesu awagamun huritiyta nabmo ne ya inaq wastonim i araqibmo wagam dimunta na akabiy an emyauqta. Emad luwim bo muran i kabiy na garabmo tisor tutauq. ⁶God-mo kabiy dimunta na alulin ne gilikmanib amta. Emim inmo kabiy na wamuzad oseq le Krai Yesu ta boldaqta akamnib nab teq in emid tihiqiy bugdaq.

⁷God agem dimunta igad ago kabiy i gibenab eman ya nenaq i araqibmo kabiy na emauqta. Sa ya iqirquran uliq kab ossa ne yaqgo afaqan na sorad ne bilaqne giqirquran os nog iyaymo. Ad mataw Yesu awagamun geg ugsa ya amenin emad gibilen sireqsa ne ya ibunib turayta. Turad ne ya ilumsihsa i araqibmo wagam dimunta na zaway ugsa in awaz timeqniyaq. Ya ne giloyinsa ne ya inan ginad diq bilaqta. Nazaq iyan ya kazaq inad dimun diqta ne bunmo negaiqta ka in daq dimunta. ⁸God ameb ya helmo bilaqaiq. Krai Yesu ne ginan anad bilaqta nazaqmo ya ne bunmo ginan inad bilaqsa ne ginadin diq emaiqta.

⁹Ya ne gimen God bulonad kazaq bilaqaiq, God haqaiq, ni mataw na gilumsihad ginad emid hastitaysa in an anan ginad bilaqgo ginad em hasiy haqaiq. Ginad em hasa daq na in gilikmanib ayahmo iyan haqaiq. ¹⁰Ad in daq bunmo gilum kemad emnanta naqmo amomo in emad osiy haqaiq. In nazaq emad oseq le Krai ta boldaqta akaman nab in gigemab ginumlan haiq diq iysa in giholib daq araq ananin waq daqayta hi usan haqaiq. ¹¹Ad kam nab Yesu Krai abin titnonta naqmo amomo in giholib ayahmo usan haqaiq. In on mataw nazaq diqta iyid teq ni nibin ayahta in gigo hib waqsa on mataw bunmo ninmo nibin tiqiluw daqay haqaiq.

Pol irquran osta na ago Yesu awagamun le ayahmo iy

¹²Ya imaqaban, ne hurit kemiy. Daq kawa ya iholib gwahtimta ka in Yesu awagamun a hi wasihaq. Haiqgam. In leh tutaq. ¹³Nazaq iyan

uliq kab Sisa ago bab matawta na teq in ago gavman mataw bunmo teq on mataw ta asor na bunmo in yaqgo tuhuritiy. Huritim in ya inan ginad kazaq tiqemay, Pol Krai asen muzinad ago kabi y emaqta na ago in irquran osaq haqay. ¹⁴Teq uliq kab ya imaqbaban Iyahta ago on matawta na kabemmo in ya iqirquran ossa ibiyad in zaway diq tiqiyay. Zaway iyad in a hi rabad God ago gamuk atoranmo bilaqayta.

¹⁵Helmo, mataw na gigo asor ginad meqinta yagad in ya ibin wazid woqsa in giben ayah iydaq haqad in Krai awagamun bilaqayta. Sa ta asor ginad dimunta yagad in Krai awagamun bilaqayta. ¹⁶Mataw ginad dimunta na in yaqgo tuhurit kemay. Ad in ginad emay, God-mo bilaqan Pol gavman matawta na Yesu awagamun gibilen sireqgo haqad in bit girquran osayta nab osaq haqay. Haqad in ya inan ginad bilaqsa in Krai awagamun bilaqayta. ¹⁷Ari mataw gihar yagayta na in on mataw gihureqid in ya ihuloseq in gigo hib lehnan haqad in Krai awagamun bilaqayta. In ginad dimunta ussa nazaq a hi emayta. Haiqgam. Ya iqirquran kab ossa in ya iholib afaqan ta araq emid ya inad ayahmo meqniydaq haqad in nazaq emayta. ¹⁸Teq ya inad a hi meqniyaq. Mataw asor na ginad meqinta ussa in Yesu awagamun bilaqayta. Sa asor na daq helta emayta. Teq in bunmo Krai awagamun bilaqsa on mataw kabemmo huritayta. Nazaq iyan ya inad dimniyaq osaiq.

Pol in Filipay gilumsihnan haqad in hidmo moqgo anad a hi amta

Teq ya inad dimniyaqta na a hi hulosdaq. ¹⁹Haiqgam. Ya inad kazaq diq emaiq. Ne yaqmen God bulonsa in Yesu Krai ago Bugaw Dimunta yagsa ya zaway iyeq osad a hi woqdaq haqaiq. In ya ilumsihsa afaqan kawa ya iholib usaqta ka le tihiqiyid ya dimunmo God ameb tuqosdaq haqaiq. ²⁰Ya inad emaiq, In ya ilumsihsa ya imebay asit a hi woqdaq haqaiq. Ya zaway diq iyeq ossa Krai abin ayahta yaqgo hib tuwaqdaq haqaiq. Nazaq iyid teq ya kayeqmo osdaq o haiq, mataw ya inol emid moqsa, daq bunmo ya iholib gwahtiqdaqta na amalib ya Krai abin emid ayah tiqiydaq haqaiq. Haqad ya God amen emad ihol tuhusisiqay. ²¹Na ezaqgo ya og kab kayeqmo osad na ya Krai inaq tisoqotim dimunmo osaiqta. Ari ya moqeq na ya tidimniy hasdaq.

²²Teq ya isan ka kayeqmo osad ya God ago kabi y emad on mataw kabemmo gilumsihaiqta. Ya naga danteqin diq muzindaiq? Dante giger na dimun. ²³Nazaq iyan ya inad giger tiqemaiq. Ya isan ka huloseq leheq Krai inaq osnan inad ayahmo usaqta. Ya Krai inaq osdaqta na in og ka ago os uriyameq dimun diqmo iydaqta. ²⁴Teq ya ne ginadin emaiqmo. Na ezaqgo ya kayeqmo osad ne tigilumsihdaqta haqad. Ari ya gihuloseq leheq ya ne a ta hi gilumsihdaq. ²⁵Nazaq iyan ya inad emaiq, Ya ne gihuloseq a hi lehdaq haqaiq. Haiqgam. Ya ne bunmo nenaq og kab tuqos tutdaq haqaiq. Osad ya ne gilumsihsa ne ginad helmo haqayta na

ayah iysa ne ginad dimniysa tuqos daqay. ²⁶Nazaq iyid teq ya le ne gigo hib a ta gwahtiqid ne ya inan ginad dimniysa Krai Yesu abin tiqiluw daqay.

Filipay on mataw Krai anan helmo haqad in abinib santitiy sor daqayta

²⁷⁻²⁸Ari ya ne gigo hib leheq nenaq osdaiq o haiq ya kab ne gigo hib pesanmo ossa tuteqmo ne daq kazaq emad osiy. Ne gigo luw os bunmo Krai awagamun na inaq rireneqmo lehan. Sa ne gigem amulikmo iyeq giwaz meqniyeq turiy. Ad ne ginad amulikmo iyeq ne an ulumsihad mataw Yesu awagamun wazbuliynan tonsa ne wagam na anononmo gibilen kemiy. Teq ne gigo bab na gihar negsa ne hi girabuniy. Ne nazaq emsa teq ya le ne gibiydaiq o haiq ya ne gigo hib pesanmo osad ya ne givin dimunta nazaq tuhuritdaiq.

Ari ne nazaq giwaz meqniyad tursa ne gigo bab ne gibiyad in gihol loyinin ginad emay, I teq timeqniyam daqagya haqay. Sa negmo ginad emay, God-mo i giqueman i kazaq giwaz meqniyim turauqta haqay. Nazaq iyan i teq leheq in inaq dimunmo tuqosam haqay. ²⁹God ne ginad eman hastitayan ne Krai anan helmo tihaqayta. Teq ne Krai anan helmo haqgomo haqad in ne a hi giwamta. Haiqgam. Ne Krai anan helmo haqad in abinib santitiy sor daqaymo haqad in ne giwamta. ³⁰Kwaziqmo Krai ababun bab yagsa ne ya ibiy yaqayta. Teq muran ya bab na em tutsa ne huritad bab amulik nabmo ne tituraymo.

I gihol wazid woqsa i gimaqbaban ginan ginad meqniyan

2 ¹Ari ne Krai aholib soqotim inaq osad ne gigem zaway iyim osayta. Ossa Krai ne ginan anad bilaqsa ne gigem kiskismo usaqta. Teq God ago Bugaw Dimunta ne bunmo giduganib ussa ne gigem dimunta mataw negad ginan ginad meqniyaqta. ²Ne nazaq emsa ya ne ginan inad tidimniyaq. Ari ne gigo daq dimdimunta na ulumsiheq ne ginad amulikmo ussa araقيبmo an anan ginad bilaqsa osiy. Osad ne gigem amulikmo ussa ne ginad amulikmo usanmo. Ne nazaq emsa teq ya ne ginan inad tidimniy naqmo diq hiquydaq. ³Ne negmo gihol anadin emad givin ayahta waqgo hi emiy. Haiqgam. Ne gihol wazid woqsa an abin iluwad an ahaqenib iyeq osiy. ⁴Ne negmo gihol ulumsihgomo daq hi emiy. Haiqgam. Ne giyogniz ginadin emad in gilumsihiyimo.

Krai inmo ahol wazan woqan God abin wazan eram

⁵Krai Yesu anad usta nazaqmo ne ginad usan.

⁶In God diq iyim osta.

Teq in ago ban ulilibta na anad a hi waz.

⁷Haiqgam. In ago ban ulilibta na hulosim in abin wazan woqan in kabibiy mat samanta abin waqim ahol ug.

Ugad in mat diq asan waqim bo tugwahtim.

⁸ Gwahtiqim in mat diq iyim osad ahol wazan woqsa in God-mo aqez muzinim lemo in tumom.

Teq in dante dimuntab a hi mom. In ayibmo dom wolan momta.

⁹ In nazaqmo ahol abin wazan woqan teq God in abin wazan ulilibmo diq iy.

Ad God in anan araq mataw bunmo ginan uriyamta na tuqug.

¹⁰ Ugan teq mataw bunmo Heven-ib osayta na teq og kab osayta na teq og aduganib usayta nagan bun diqmo in Yesus anan biyad teq in ayon gibakbakan tuqulum laquw daqay.

¹¹ Ad in bunmo bilaq daqay, Yesus Krai in Iyahta haq daqay.

Haqsa Amam God abin ulilibmo diq gwale tuqusdaq.

I ulig oyaq nazaq nog mataw gilikmanib osuq

¹²⁻¹³ Ari ya iyogniz, negmo teq kazaq emiy. Ne yaqgo nan hurit yaqayta nazaqmo ne muran em tutad osiy. Teq ya nenaq ossa ne nan huritiy haqad ya a hi bilaqaiq. Haiqqam. Muran kam kab ya ne gihulosim uliq kab pesanmo ossa ne ya iqez ka hurit naqmo hiqiyiy haqaiq. Ne ginad emiy. God-mo ne gimuganib kabiy emad in ne ginad wazan eraqsa in anad usaqta nazaqmo ne kabiy daq emayta. Nazaq iyan God ne giwaqnan haqad gimen dante amta na ne muzinad gihol anononmo wamuzad ne rabad gihol harara nemsad dante na muzinad luwiy.

¹⁴ Kabiy daq bunmo ne emad na ago ananin kabemmo ne bilaqad an hi mugiy. ¹⁵⁻¹⁶ Ne nazaq emad oseq teq ne gigemab ginumlan hiqiya afaqan araq a hi em daqay. Haiqqam. On mataw meqmeqinta muran kam kab osayta ka gilikmanib ne God ago onmin dimun diqta iyeq tuqos daqay. Osad on mataw na daq hihiq emsa ne os dimunta kayeqmo os tut daqayta na agamukan tigibilen daqay. Ne gamuk dimunta na gibilenad ne bilaqne ulig kaitab oyayta nazaq nog ne on mataw God gileh ugayta na gilikmanib oyad tuqos daqay. Ne nazaq diq emid teq Krai ta boldaqta akaman nab ya ihol abin iluwad bilaqdaiq, Ya kabiy samanmo a hi em haqdaiq. Ad yaqgo zaway hunegan le saman a hi iy haqdaiq.

¹⁷ Ne Yesus anan helmo diq haqad God ago kabiy emad ne gihol bunmo tamaz nog God ugayta. Sa abeb mataw ya inol emid inedan wain ayun nog ne gigo naw na amalib wazbalid woqsa i agaribmo gihol tamaz nog God tuqugam. Ya ihol nazaq diq loyinaiqta teq ya inad a hi meqniyaq. Haiqqam. Ne ya inan ginad dimniya ya inad tidimniyaqmo. ¹⁸ Ad nazaqmo ya ne ginan inad dimniya ne ginad dimniyanmo.

Pol Timoti emid uliq Filipay-ib lehnan bilam

¹⁹ Ari Iyahta Yesus anad bilaqid teq ya Timoti emid nawa ne gigo hib hidmo tilehdaq. Leheq in muleq ta boleq ne ezaq osayta na awagamun

ibilenid ya igem zaway tiqiydaq haqad. ²⁰Yaqqo mat araq Timoti nogta haiqqam. In anad ya inad nog iyim in ne ginadin diq emaqta. ²¹Mataw asor bunmo in gimo gihol anadin emad in Yesus Krai ago kabi anadin diq a hi emayta. ²²Teq negmo Timoti ago tuhuritiyta. In mat atuw inaqa. Amun amam ulumsihaqa nazaq in ya ilumsihsa i garabmo Yesus awagamun dimunta akabiyan emauqa. ²³Nazaq iyan ya bit kab ossa yaqqo hazizir le ezaq iyid ya ahol waqad teq ya Timoti emid hidmo nawa ne gigo hib tilehdaq. ²⁴Teq ya inad emaiq, Asit naqmo Iyahta yaqmen dan emid ya ne gigo hib tilehdaiqmo haqaiq.

Pol Epafroditus emid uliq Filipay-ib lehnan bilam

²⁵Teq ya inad emaiq, Ya Epafroditus ne gigo hib emid in muleqeq ta lehdaq haqaiq. Na in ya imaqbab nog iyim ya inaq i araqibmo kabi emad Yesus ago bab nenaq an wolauqa. Kwaziqmo ne mat na yaqqo hib eman bolim in ya ilumsihad osim bo muran tiqiy. ²⁶Iyim in muran ne gibiynan anad diq meqniyaqa. Ad in moqad usta na ago ne huritim ginadnad emiyta na ago in agem afaan iyaqmo. ²⁷Helmo in moq waqim tumoqnan tonta. Teq God in anan anad meqniy. Anad meqniysa in Epafroditus amomo anan anad a hi meqniysa in ya inan anad meqniymo. In anad kazaq am. Pol irquran osaqa na ago afaan sorsa in ayow na moqid ago afaan na ayah diqmo isihdaq haqad in Epafroditus ulumsihan a hi mom. ²⁸Nazaq iyan ya in emid ne gigo hib lehnan inad ayahmo bilaqay. In ne gigo hib lehid ne ahol waqad teq ne ginad tidimniydaq. Sa ya ne ginadin emad inadnad kabemmo emaiqa na asit tihiqiydaq. ²⁹⁻³⁰Nazaq iyan in le ne gigo hib gwahtiqid ne ginad dimniysa Iyahta abinib in waqiy. In Krai ago kabi aduganib moqnan tonta. Ne ya ilumsiheq yaqqo kabi ka asor a hi em daqayta iyan in ame wolnetnan haqad inmo ahol nog hulosan ton. Nazaq iyan ne mataw naqanta givin tiqiluw daqay.

Mat Krai anan helmo haqayta naqmo in mat titnonta

3 ¹Ya imaqaban, yaqqo gamuk ta asor usaqa na in kazaq. Ne Iyahta anan ginad dimniyan. Gamuk na ya ne gimen tumar tonta. Teq ne gamuk na anadin emad dimunmo tuqos daqay haqad ya a ta mar tonnan ituw a hi hiqiyaq.

²Mataw gihol abatan asan urotgo bilaqayta na gigo ne gihol waz naqmo hiqiyiy. Na in bilaqne gaun karuw asan mugtitay nog iyim in mataw gisan meqin tonayta. In bilaqay, I mataw gisan urotsa in God ago dauhibta iyay haqayta. ³Haiqqam. Igmo God ago dauhibta iyim tuqosauqa. Igmo God ago Bugaw Dimunta amalib God ayon lotu emauqa. Ad Krai Yesus amomo i gilumsihan i in abin iluwauqa. Teq i ginad emauq, Gisan akabiyan kabemmo emayta na asit a hi gilumsihdaq haqauqa. ⁴Ari gisango daq nagan mataw gilumsihdaqta iyid ya kwaziqmo tidimniy

nagta. Mataw asor gisango daq kabemmo emim in ginad emay, Daq kaqmo i tigilumsihdaq haqayta. Teq gisango daq na gigo hib ya mataw na giquiriyamim ya ihol abin tidimniyim usta. ⁵Ya inen iqeman yaqgo kam 8 nazaq tiqiyen mataw ya isan urotiyta. Teq ya Bensamin anaynayin araq iyim ya Isrel mat diqta araq. Nazaq iyan ya Hibru gigo ned watwatmota. Teq ya Farisi araq iyim ya God ago maror Moses bilamta na anononmo muzinyaiqta. ⁶Ya God ago kabiy emnan zaway diq iyim ya Yesus ago on mataw gimuzad gimeqin tonyaiqta. Teq ya God ago maror Moses bilamta na ago gunun muzin bugsa mataw ya ilum kemim yaqgo afaqan araq ahol a hi waqad in ya inan mat titnonta haq yaqayta.

⁷Kwaziqmo ya inad emyaiq, Ya Juda gigo maror muzin bugta na ago God tiqiwaqdaq haqyaiq. Ta teq muran ya KraiS ago tuhurit kemim ya gisango daq bunmo emta na in bilaqne nagah samanta nog tiqiy. ⁸Helmo ya bilaqaiq. Ya ibin dimunta usta na ya inadib in nagah diq a haiqta. Ari yaqgo Iyahta KraiS Yesus ago ya tuhuritta naqmo in nagah heltaqmo. Ya KraiS amomo ago hib soqotnan haqad nagah bunmo ya inad wazta na ya tuhulos bug. Ad KraiS amomo ilumsihdaq haqad ya gunun akabiyan kabemmo emta na ya inadib in bilaqne naga hekbel didaq asan nog tiqiy. ⁹Ya KraiS amomo ago hib soqotnan inad bilaqaiq. Ad ya God ago maror Moses bilamta na muzinad matawmo gigo hib ihol abin titnonta waqnan inad a hi bilaqaiq. Haiqgam. Ya KraiS anan helmo haqeq God-mo ago hib ibin titnonta waqnan inad usaq. Gibin titnonta na mataw KraiS anan helmo haqsa God-mo in gibin na negaqtta. ¹⁰Ya KraiS ago hurit kemnan inad ayahmo usaqta. Teq God ago zaway KraiS wazan eramta na ya iholib loyinnanmo. Ad KraiS santitiiy sorta nazaqmo ya in ago santitiiy na asor sornanmo. Ya nazaq emeq teq KraiS santitiiy sorim le in momta nazaqmo ya in asen muzeq in amta nazaq ya emnanmo. ¹¹Ya ihol nazaq bibiyowunad oseq teq KraiS hodhodab eramta nazaqmo ya hodhodab useq tiqueraqdaiqmo haqaiq.

Pol zaway diq iyeq sibeq le God tow amta nab in gwahtiqlan bilam

¹²Ya KraiS ago daq naway na giwaq bugan tiqiyunin nazaq ya a hi bilaqdaiq. Teq ya mat dimun diq tiqiy hasta nazaq a haiqmo. KraiS Yesus ya iwaqan ya in ago tiqiyta. Nazaq iyan muran ya in ago daq nagan wazeq ihol ugid yaqgo tiqiy bugdaq haqad ya iholtuw bulad tiluwaiq. ¹³Ya imaqbaban, ya inad kazaq emaiq. Ya KraiS ago daq nagan a hi waz bugaiqta haqaiq. Teq daq amulikmo ya emaiqta na in kazaq. Kabiiy daq bunmo ya ibun ban tilahta nagan anan ya idek zizalsa nagah dimunta ya inobun ban usaqta naqmo ya waznan iholtuw diq bulaiqta. ¹⁴Ya zaway diq iyeq sibeq le God yaqmen tow eman usaqta nab gwahtiqeq naw dimunta na tuwaqdaiq haqad ya iwaz meqniyim iholtuw bulad luwaiqta. Naw na God ya ililewunan ya dante KraiS Yesus yaqmen amta na muzineq gwale Heven-ib tiqiyeq teq ya tuwaqdaiqta.

¹⁵Ari i on mataw ginad tizilimta na, i bunmo ginad nawa ya tibilayta nazaqmo usan. Ad ne ginad ta araq usid teq God giqisihunid ne ginad tiqem has daqay. ¹⁶Teq nagah bunmo ago i ginad tiqem hasauqta naqmo i waz naqmo hiqiyad adan emuq.

¹⁷Ya imaqbaban, ne ya isen muzeq ya daq em nogmo ne emiy. Ne ezaq luw os daqayta na ago i tigibilen bug. Nazaq iyan mataw i gisen muzad daq emsa ne gibiy kemiy. ¹⁸Na ezaqgo mataw kabemmo Krais ago kruse gihar ugad osayta. Ya ime kabemmo ne gidek wazad mataw na ginan tigibilenta. Ad muran ya a ta gibilen tonad ya imeqil woqaq. ¹⁹Mataw na oseq teq tihiqiy daqayta. In gihol ginadmo bilaqne in gigo god nog iyan in daq amo amo amebay inaqtta emad luwayta. Teq in gimebay a hi woqaqta. Haiqgam. In gihol abin iluwad ginad dimniysa osayta. Mataw naqanta in og ka ago nagahmo ginadin emayta.

²⁰Ari igmo i on mataw Heven-ibta. Mat i gilumsiheq ta giwaqdaqta na amatin in saw nabmo oseq teq a ta gewoqdaqta. Na i gigo Iyahta Yesus Krais-mo. I in baq tunad gihol husisiqsa osauqta. ²¹In ago zaway ayahta amalib nagah bunmo giqemid ahaqenib tiqiy bugdaqta. Ad in ago zaway naqmo amalib i gihol meqinta ka emid inmo ahol anuwanta nog iyeq dimun diq tiqiydaqta.

I gigem amulikmo iyeq ginad dimniysa osad ginad dimunta waquq

4 ¹Nazaq iyan ya imaqbaban dimunta, ya tibilayta nazaqmo ne Iyahta ago hib soqoteq giwaz meqniyeq turij. Ya ne ginan inad bilaqsa ya ne gibiyinan igem gaqaqta. Ne bilaqne yaqgo kabiy anawun dimun diqta nog iysa ya ne ginan inad tidimniyaqta.

²Teq ya on giger Yuodiya ayow Sintike inaq ginan inad meqniysa ya kazaq atoranno gibilenaiq. Ne giger Iyahta ago on iyim iyan ne gigem amulikmo iyeq osiy haqaiq. ³Ad mat ni yaqgo mangteqsor diqta na ya ni kazaq nibilenaiq, Ni on giger na gilumsih haqaiq. In giger ya iteqsormo diq iyan i garibmo Yesus awagamun dimunta na akabiyann emyauqta. Sa Klemen teq ya iyogniz ta asor ya nenaq kabiy emyauqta na in on giger na nenaq kabiy em yaqaytamo. In bunmo ginan God ago buk mataw kayeqmo tuteqmo os daqayta ginan usaqta nab mar tonan usaq.

⁴Ari ne bunmo Iyahta ago hib tisoqotim osad iyan tuteqmo ne ginad dimniysa osiy. Ya gamuk na a ta bilaq tonnan. Ne ginadmo dimniyan.

⁵Teq ne tok nemeq kiskismo ossa on mataw bunmo ne gigo daq na ahol waq kemiy. Iyahta ne gigerabmo diq osaqtta. ⁶Sa ne nagah araq anan ginad hi meqniyan. Haiqgam. Ne gigo kabiy daq bunmo ago ne God bulonad susumun ugiy. Ad ne God inaq gamuk emad susumun ugad teq ne esey ugiy. ⁷Ne Krais Yesus aholib soqotim inaq ossa God-mo ne gigem ginad wamuzsa ne gigem kiskismo tuqusdaq. Sa afaqan ne giholib gwahtiqsa ne ezaq tonim gigem kute nemaqta na ago ne a hi hurit daqay.

⁸Ya imaqbaban, yaqgo gamuk ta asor usaqta na in kazaq. Ne ginad kazaq emad osiy. Naga daqin in helta teq in abin dimunta teq in titnonta teq in anumlan haiqta teq in awaq dimunta teq in ulalab emnanta, daq naqanta bunmo ne anadin emad luwiy. Daq dimdimun diqta teq daq bunmo i abin wazid eraqnag diqta nagan bunmo ne anadin emad adan emiy. ⁹Daq emnanta na bunmo ya anan gibilenan ne huritim tuwaqiyta. Teq ya daq na bunmo emsa ne yaqgo hib ahol tuwaq kemiymo. Nazaq iyan ne daq dimdimunta nagan emsa God i gigem eman kiskismo usaqta na in ne nenaq tuqosdaq.

Filipay on mataw Pol amen naw eman bolan in anad ayahmo dimniy

¹⁰Kam sisaq nog ne ya inan ginad meqniyaqta na ya asit a hi loyinta. Helmo ne ya inadin em yaqayta teq ne gigo dan hiqiyay. Ari muran Iyahta ne gimen dan eman ne ya tiqilumsihay. Nazaq iyan ya inad diq dimniyaq. ¹¹Teq ya nagah ago siqim iyim osta na ago ya a hi bilaqaiq. Haiqgam. Ya nagah osgo inaq o haiq na ya inad a hi meqniysa ya igem dimunmo usaqta. ¹²Kam asor ya mat ina haiqta nog osaiqta. Ad kam asor yaqgo nagah kabemmo inaq iyim osaiqta. Kam asor ya didaq kabemmo neqaiqta. Ad kam asor ya zarow diq iyim osaiqta. Teq ya kam bunmo igem dimniysa osgo adan na ya tuhurit kem. Nazaq iyan ya nagah kabemmo inaq iyim osaiqta na ago ya a hi bilaqad ya igem dimniysa osaiqta. Ad ya nagah kabemmo ago siqim iyim osaiqta na ago ya a hi bilaqad ya igem dimniysa osaiqtamo. ¹³Krais-mo ya zaway yagsa ya kam bunmo igem dimniysa osaiqta.

¹⁴Teq ne yaqgo afaqan na gihol ugim soran ya inad tidimniyaq. Na ne daq dimunta emay. ¹⁵Ne mebmemo Yesus awagamun dimunta huritiya nab ya nenaq osim teq ya eraqim saw Masedoniya hulosis lehsa Yesus ago dauh araq ya a hi ilumsihiy. Haiqgam. In yaqgo hib nagah tuwaqim teq in amenin emim nagah araq a hi yagiy. Kam nab ne gimomo ya ilumsihiyta. Na ne Filipay on mataw, ne tuhuritiya. ¹⁶Teq ya ne gihulosim le uliq Tesalonaika-ib kabiya emad nagah ago siqim iysa ne ya ilumsihim teq ne a ta ilumsih toniy. ¹⁷Teq ya ne gigo nagah anan a hi sunaiq. Haiqgam. Ya inad kazaq emaiq. Ne ya ilumsihsa ne gigo daq dimunta na anon kabemmo tisorqendaq haqaiq. Sa abeb God ne gigo daq anon kabemmo na ahol waqad in amenin dimunta tineгдаq haqaiq. Na ago ne ya ilumsihan ya inad tidimniyaq.

¹⁸Ari Epafroditus ne gigo naw a bolim ya ibenab tiqam. Eman ya ne gigo nagah na waqan in tiqiyunin. Nagah ne yag daqayta na ne uriyamim nagah asor bunta inaqmo ne emiy. Ne gigo naw na bilaqne faq aqasin ahuran dimunta nog iyan God tamaz na waqim aqem tidimniyaq. ¹⁹Teq yaqgo God ago nagah dimdimun diqta bunmo Krais Yesus ago hib usaqta. Nazaq iyan ne Krais aholib soqotim inaq ossa nagah bunmo ago ne siqim

iyayta na God-mo negid tigiynindaq. ²⁰I Gimam God abin tuteqmo kuluwa-kuluwmo iluwuq. Hel diqtaqmo.

Gamuk asor

²¹Ya ne gigo hib on mataw Kraiſ Yesuſ aholib soqotim God ago on mataw tawonta iyim osayta na bunmo yaqgo zeq dimun ka in negaiq. Sa ya imaqbaban Kraiſ ago on mataw ya nenaq kawa osaiqta ka in zeq dimun ne negaymo. ²²Teq God ago on mataw tawonta kab osayta na bunmo in gigo zeq dimun ne negad in gilikmanib mataw asor Sisa ago bitab kabiſ emayta na in ne ginadin emad in gigo zeq dimun eman nawa lehaqmo.

²³I gigo Iyahta Yesuſ Kraiſ agem dimunta ne bunmo negan. Nawaqmo.